

DOMENIE XXXIII «VIE PAL AN»

Antifone di jentrade Jer 29,11.12.14

Al dîs il Signôr: Jo o cognòs projets di pâs e no di disgraciis;
mi clamarê e jo us scoltarai
e us tornarai a menâ dongje di ducj i lûcs
là che us ài dispierdûts.

Colete

Signôr, nestri Diu, danus la gracie
di cjatâ simpri la nestre contentece tal jessiti fedêi
parcè che dome servint chel che al à creadis dutis lis robis buinis
o podarin vê gjonde complete e eterne.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE MI 3,19-20

Par vualtris al jevarà il soreli de justizie.

Dal libri dal profete Malachie

Cussi al dîs il Signôr: «Ve, e sta rivant la zornade infogade come une fornâs. Ducj i prepotents e ducj i triscj a saran stranc. Ur darà fûc la zornade che e sta rivant, al dîs il Signôr des schiriis, di mût che no resti di lôr ni lidrîs ni butul. Par vualtris che o temês il gno non al jevarà il soreli de justizie». Peraule di Diu.

SALM RESPONSORIÂL dal Salm 97

R. Ven, Signôr, a giudicâ la tiere.

Fasêt al Signôr une cjante cu la citare,
cu la citare e cul sun dal salteri;
cul sun dal cuar e cu lis trombis;
in face dal re, dal Signôr scriulait. R.

Che si sgrisuli il mâr cun dut ce che al à dentri,
il mont cun dute la int che si cjate;
che a batin lis mans lis aghis,
e lis monts che a berlin di gjonde. R.

Che a berlin di gjonde denant dal Signôr che al rive,
che al rive a giudicâ la tiere;
al judicarà il mont cun justizie
e i popui cun cussience. R.

SECONDE LETURE 2 Ts 3,7-12

Se un nol à voe di lavorâ, nol à nancje di mangjâ.

De seconde letare di san Pauli apuestul ai Tessalonicês

Fradis, vualtris o savês in ce maniere che o vês di spielâsi in nô parcè che no vin stât framieç di vualtris cence fâ nuie e nancje no vin mangjât a scroc il pan di nissun, ma fadiant e scombatint, lavorant di e gnot par no jessi di pê a nissun di vualtris. No dîs che no 'nt vin dirit, ma si compuartin cussi par dâus un spieli di imitâ. Di fat ancje cuant che o jerin cun vualtris us raccomandavin chest: se un nol à voe di lavorâ, nol à nancje di mangjâ. O vin ancje sintût a dî che cualchidun al vîf framieç di vualtris in maniere disordenade, no fasint un colp di nuie ma impaçantsi in dut. A di chê int li ur comandin e ur raccomandin ancje tal Signôr Jesù Crist di mangjâ il lôr pan lavorant cence fâ confusion.

Peraule di Diu.

CJANT AL VANZELI cf. Mt 24,42.44

R. Aleluia, aleluia.

Veglait e tignîtsi pronts,
parcè che no savês in ce di che al ven il Signôr.

R. Aleluia.

VANZELI Lc 21,5-19

O salvarês lis vuestris animis cul tignî dâr.

Dal vanzeli seont Luche

In chê volte, stant che cualchidun al fevelave dal templi e al diseve che al jere une vore biel pes pieris e pai regâi di avôt che lu furnivin, Jesù al disè: «A vignaran zornadis che dut ce che o stais cjalant al vignarà sdrumât e no restarà piere sore piere». Alore lu interpelavin: «Mestri, cuant sucedaraial dut chest e cuâl saraial il segnâl che al sta par sucedi?».

Jesù ur disè: «Stait atents di no lassâsi imbroiâ. Parcè che a vignaran in tancj e si presentaran a gno non disint: O soi jo, e: Il moment al sta rivant. Vualtris però no stait a lâ daûr di lôr. Cuant che o sintarês a fevelâ di vueris e di rivoluzions, no stait a vê pôre. Di fat chestis robis a scuegnin sucedi, ma nol vûl dî che subit dopo e sarà la fin».

Alore ur diseve: «Un popul al jevarà cuintri di un altri popul e un ream cuintri di un altri ream. A saran pardut taramots, miseriis e pestilencis; a saran ancje spiei di fâ spavent e grancj segnâi dal cîl. Ma prin di dut chest, us çjaparan cu la fuarce e us perseguitaran, consegnantjus tes sinagoghis e tes presons, strissinantjus denant dai lôr rês e dai lôr governadôrs, par colpe dal gno non. In chê volte o varês ocasion di dâmi testimoniance. Us siguri che no vês di bacilâ par chel che o disarês par parâsi; jo in persone us darai lengaç e sapience, di mût che i vuestris nemîs no podaran ni tignîus teste ni rispuindius. O sarês tradîts parfin dai gjenitôrs e dai fradis, dai parincj e dai amîs, e une vore di vualtris a saran copâts; o sarês odeâts di ducj par colpe dal gno non. Cun dut a chel, nancje un cjaveli dal vuestri cjâf nol larà pierdût. O salvarês lis vuestris animis cul tignî dâr».

Peraule dal Signôr.

Su lis ufiertis

Signôr, fâs che il regâl
presentât denant dai vôi de tô maiestât
nus otegni la gracie de religjon
e nus siguri un'eternitât furtunade.
Par Crist nestri Signôr.

Antifone a la comunion Sal 72,28

Par me il gno ben al è dome stâ dongje di Diu,
tal Signôr Idiu o ài metût il gno ripâr.

Daspò de comunion

O vin ricevûts, Signôr, i regâi dal to sant misteri
e ti prein cun dute umiltât
che al zovi a fâ cressi il nestri amôr
ce che to Fi nus à ordenât di fâ in sô memorie.
Par Crist nestri Signôr.